

KPÉDÉLÉ TÈSÁLÓNÌKÀ
Kpédélé bà cu wáràgà mì
Páwòlò jì ndâ mbe kù kili ta ɾè
mì Bìndi-Mbíɾì gbí gbata
Tèsàlónìkà

¹ Muu ze tí ndâ mbe kù cu wáràgà tí nó a ndâ 'duu ta'ò: ñinó a ye tí Páwòlò, gii je Sillivánò, gii je Tìmatéyò, ká kù cu wáràgà tí nó jì ndâ mbe kù kili ta ɾè mì Bìndi-Mbíɾì gbí gbata Tèsàlónìkà, tí ndâ 'duu mì ndâ Mbíɾì Buù, ta Mbe tí ndoo Jézù tí Bìndi-Mbíɾì. Ze kù cu wáràgà tí nó ta bà 'deke tí ze jì Mbíɾì máa, yí 'ví cù 'dê ngo cù wó mítí yo. Yí delè 'ví si yo 'ví dù ta 'dê njembí yo.

Na cè bà 'vala ndâ 'duu gbí gbata Tèsàlónìkà, ta ɱa cè bà tee njembí ndú mítí Mbíɾì

² Ze ta o 'dáá gí kù 'dè ñikì maa jì Mbíɾì tacó tí yo 'dáá gí. ɾè yo delè jé waa 'do gbí nje ze ta o tí nó náa ze má kù 'deke tí ze jì Mbíɾì nó lá. ³ Bà mbí ze delè jé ta 'bí ɾi gbaànjé ò tí ndâ nèté tí nó náa yo kù bàkà 'do gbí có mì bà tee njembí yo á mítí wó tí Mbíɾì nó lá; bà mbí ze jé ò 'do tí ndâ nèté tí nó 'dáá gí náa yo kù bàkà ta tó njembí yo gítí Mbíɾì nó lá; à delè jé ò 'do tí bà koɾo có mì yo lì kácaá mítí Mbe tí ndoo Jézù tí Bìndi-Mbíɾì lá.

⁴ Ze ñò ni gí, máa, Mbíɾì zè yo ñikì ngé ndii gí, ndâ ná'vindí ze. Ze delè gii ñò ni gí, máa, a yí ká cu 'bì wó mítí yo, máa, yo dù tí ndâ 'dóó ñinó

mì yì. ⁵ Ze ònò ni énnò gî, tacó Banga-Ngú-Có tí nó náa ze táánò ma jì yó nó me káa bódó có sínò lá. Ze ma jì yó a có ta wotí ká tí , tí wotí mì Bèrì-mì-Mbíri, tí có náa ze ònò ni tí yúcó gî. Yo delè ònò ni énnò 'do tí ña 'wálá tí nó náa ze táánò kù 'vala tacó tí yó si ze kuu mì yó kà nó gî. ⁶ Yo táánò gí tí ndâ mbe ɾu ndi ze. Yo delè gii gí tí ndâ mbe ɾu ndi Mbe tí ndoo 'do gbí bà kònò sé'i mì yó. Ndâ mbe kù mèèkè'i tí yó táánò 'dee yó kigirigii gî, káa à gii wu bà ùnje gítí Banga-Ngú-Có ta líkí'o jì yó a Bèrì-mì-Mbíri.

⁷ Tacó énnò, ndâ mbe kù kili ta ɾè mì Bìndi-Mbíri gbí ndâ to Mèsidóniyà ta ndâ to Àkáyà gii ònò bà kònò sé'i ta líkí'o muu Banga-Ngú-Có ni a i 'do mì yó. ⁸ Tacó ndú 'di me káa tàwo bà ma có mì Bìndi-Mbíri mì yó cuki lá. Có bà tee njembí yó mítí Mbíri delè wu cee muu to tí ña ñinó náa gbí nderè bà 'dè có mì ze jì ndâ 'duù gítí káká'i wálá. ⁹ À ndí kpónó a ndâ 'duù ká kù dítà ña nèté tí nó náa ze táánò 'bità bà bàkà gbí òkò tí yó nó jì ze. À delè káa ndâ 'duù ká kù dítà ña bà 'visì muu yó 'do tí ndâ bààcì gítí Mbíri, ta tàwo bà bàkà nèté mì cèè Mbíri tí nó tí wu Mbíri nó mì yó jì ze. ¹⁰ À 'dáá káa ndâ 'duù ká kù 'vanda ndi có bìndi yó gítí bà gí 'Viì-mì-Mbíri 'do gbíri jì ze, 'Viì-mì-Mbíri tí nó tí Jézù, náa Mbíri 'vala ndi wó 'do gbí muu'dú wó nô, Jézù tí nó tí mbe 'vala ndoo á 'do kùro kpo-tàkòcò tí nó náa Mbíri kèjì tí gítí ndâ 'duù nô.

2

Nèté mì Páwòlò gbí gbata Tèsàlónìkà

¹ Yo ta kpéetí yo ò ni gî, máa, ze táánò co gí mì yo kà me kùnga wírì lá. Ze ya gí mì yo ta nderè, bìndi nderè mì ze nò giì yù gî, ndâ ná'vindí ze. ² Yo ò ni gî máa, ze táánò ta 'bí o á kùro bà ya ze gí mì yo kà 'de kpo-se-muu, ze delè giì 'de bà ònoko ze mì ndâ 'duù gbí gbata Fílípì gî. Káa áá táánò a Mbírì mì ze ká je wotí ji ze, náa ze giì ma tí ta Banga-Ngú-Có mì wó ji yo á mí kùro ndâ kpo-kpò mbe kù jòò gbí có ta yí nò. ³ Rèngbó có tí nó náa ze kpónó kù ma ji yo nó me 'vére lá; à me vò kóró-koro có lá; à delè me có ta tírì ká gbí lá. ⁴ À me éno lá. À káa Mbírì 'do gbí 'dóó có mì wó gbí njembí wó ká ò ze ni tí ndâ 'duù ònó náa yì má kpili Banga-Ngú-Có ji ze, ze bà ni bà 'dòkò ndi á go yí á ji ndâ 'duù gî. À má éno, ze kù 'dè có me tacó bà peteke tàkòcò ndâ 'duù lá. Ze kù 'dè có a i tacó bà peteke tàkòcò wó tí Mbírì, tí mbe kù ò ndâ òa có gbí njembí ze. ⁵ Yo ò ngbàrángà'i ní gî, Mbírì delè ò ni gî máa, ze jé 'dè 'vére ji yo tacó bà peteke tàkòcò yo nò lá. Ze delè jé bàkà tírì tacó bà 'de i 'do tí yo lá. ⁶ Ze jé pà kpokèjì tacó wàa, ndâ 'duù 'ví ùlù tí ta ze nò lá. Ze pà ndâ i tí nò 'do mì yo lá. Ze delè pà ndú 'do mì ndâ 'bí 'duù lá.

⁷ Ònò táánò bà dù a ndâ i ònó náa ze bà kùmùkù yo, máa, yo bàkà ji ze, sé náa ze a ndâ tú mì Bìndi-Mbírì nò, káa ze táánò ya gítì ndâ òa ònò lá. Ze táánò dù gbí òkò tí yo ta pétékè 'bì ze, go 'bì niì mbe kù kpòlo tí dó 'viì mì wó. ⁸ Tacó éno, go yo táánò tí ze ngé ndii gî. Òa go yo tí nò táánò tí ze nò! Go yo giì te ze cuki me ká gítì bà ma Banga-Ngú-Có ji yo lá. À giì te mítí

ze delè a go bà 'vala ta ɾè mì yo. Yo táánò a ndâ wú-gbí-ɾé ze.

⁹ Go bà 'va mbí yo gítí ndâ ɲa serè nèté tí nó náa ze táánò kù bàkà nó kuu tí ze, ndâ ná'vindí ze. Síí gbí o bà bàkà nèté tacó bà 'de ndâ i mì ze gítí mĩri ze ta o tí nò náa ze táánò kù ma ta Banga-Ŋú-Có ji yo nò wálá. Ze táánò ɲò ɾi ni lá. Ze delè ɲò bèbìlì ni lá. Ze táánò kù bàkà ndâ ɲa serè nèté tí nò éno, tacó wàa, ze 'ví pèè ta mbí 'bí 'duù gbaànjé tacó 'bí i ta o tí nò náa ze táánò kù ma ta Banga-Ŋú-Có ji yo nò lá.

¹⁰ Yo ɲò ta ɾo yo gí, Mbíri delè ɲò gí, máa, ze táánò kù 'vala ta yo gbí tó ɲa kpokèjì. Ze 'vala ta yo ta banga tí, ta tiɾi mì ze gítí yo wálá. ¹¹ Yo ɲò ni gí, máa, ze táánò kù kpo-gbí-tà-tù yo ká go bà kpo-gbí-tà-tù ndâ 'viì mì bu ndú. Ze kù je wotí jì yo ká go bà je wotí mì bu ndâ 'viì á jì ndâ 'viì mì wó. Ze delè kù do mítí yo náa yo má bàkà i mbe lè gí ká go ɲinó náa bu ndâ 'viì kù bàkà ta ndú. ¹² Ze táánò a ndâ mbe kù nìbà kpokèjì ɲinó jáá nó jì yo. Ze a ndâ mbe kù je wotí jì yo. Ze delè a ndâ mbe kù 'deke tí ze jì yo, máa, yo 'ví co tí kpokèjì ɲinó mbe kù nìkì tí Mbíri, tí mbe kù tè'é tí yo gí gbí ngba wó, delè tí mbe kù tè'é tí yo máa, yo 'ví dù tí ndâ bòò-gba mì yì nò.

¹³ Ze ta o 'dáá gí kù 'dè nìkì maa jì Mbíri tacó tí yo, tacó ta o tí nó náa ze táánò ya tí ta có mì wó tí Mbíri gí mì yo kà nó, yo gii ùnje gítí gí. Yo ùnje gítí nò me go bà ùnje mì 'duù gítí có mbe co 'do gbí nje 'bí ka wó 'duù á muu to tí nó nò lá. Yo ùnje gítí a i go bà ùnje mì ndâ 'duù gítí có mbe co 'do gbí nje Mbíri. À dú káa yúco, có tí nò

náa ze táánò ma ji yo nò a có mbe co 'do gbí nje Mbířì, à me có náa 'bí 'duù ká kořo 'do gbí muu wó nò lá. A có tí nó mì Mbířì mbe dù kù bàkà nèté gbí njembí ndâ mbe ùnje gítí gî nô. ¹⁴ Tacó yo tí ndâ ná'vindí ze kpónó kù co ká ndírí tí gbèe kpokèjì tí nó náa ndâ 'duù mì Mbířì mbe kù kili ta rẹ̀ mì Bìndi-Mbířì gbí ndâ to Jùdèyà kù co tí nô. Tacó yo kù mbu ji bà mèèkè'i tí yo mì ndâ 'dóó nambe yo jé ká go ña bà mbu ndú 'bì ndâ nambe ndú tí ndâ Jùdèyà, ¹⁵ tí ndâ mbe zi Mbe tí ndoo tí Jézù. A ndâ ña ndâ 'duù tí nò táánò ká ziki ndâ 'bí mbe 'dòkò có mì Mbířì. Áá táánò a ndú tí ndâ Jùdèyà ká kù mèèkè'i tí ze. I tí ndú a bà bàkà ndâ i ñìnó mbe kù kpolo tàkòcò Mbířì, gii je bà jòò gbí có ta ndâ 'duù 'dáá gî. ¹⁶ A ndú táánò ká kù bàkà bà jòò gbí có, ta bà nè kpokèjì bà ma có mì Mbířì ji ndâ 'duù ñìnó ta ña ndú me ndâ Jùdèyà lá nó 'do tí ze, tacó wàa ndâ 'duù ñìnó náa ndú me ndâ Jùdèyà lá nó 'ví 'de ta 'válá lá. Ndú kù bàkà vò i ká mí pí ka wó vò i. Káa ndú bà 'de mbèlè kpo-tàkòcò mì Mbířì mítí ndú.

Go bà co wiri gí Tèsàlónìkà káká'i kuu tí Páwòlò

¹⁷ Káa à má gítí ze, ndâ ná'vindí ze, 'do tí o tí nó táánò náa ndoo njèè ta gbí òkò tí ndoo ta làmbu o nó, à káa kùfolofo dù ze ká kàá, káa njembí ze 'dáá gî a i mì yo kà. Ze bàkà ña i muu to tí nó cee gî, tacó wàa ndoo 'ví ñò ta tí ndoo káká'i, ¹⁸ tacó kò'o tí yo bàkà có bà zi ze gî. 'Dóó ye tí Páwòlò nó bàkà dú káa ndi ye tacó bà ñò yo, káa Vò-'duù-tí-nò nè kpokèjì 'do tí ye gî. ¹⁹ Yo kù kořo có máa a ndâ 'dí ká bà te líkí'o mítí ze

kùro Mbe tí ndoo tí Jézù ta o bà gí yí wúnò? À me yo lá? A yo wúnò ká bà dù tí ndâ ngbù êré náa ze bà seke mí gbí muu ze, kù dùlù ta tí ze ta ña wálá kùro Mbe tí ndoo tí Jézù. ²⁰ Tacó a yo ká kù mba ze. À delè káa yo ká kù peteke tàkòcò ze.

3

¹ Bà zèè njembí ze gítí bà njèè gbí òkò tí ndoo dúú kù ya tí mâ gii co tí ze gí, ndòngbú có mì ze gii dù ènò máa, à ñikì tí ze á bà tuu Tìmatéyò ya tí ji yo kà, wàa ze ta Sìlìvànò 'ví dù ñìndi ze gbí gbata Àtínà. ² Tacó ènò, ze gii tuu Tìmatéyò tí ná'vindí ze, tí ka ze náa ze kù bàkà nèté mì Mbìrì tí nèté bà ma Banga-Ngú-Có mì Bìndi-Mbìrì ta ndú nó, máa, yí 'ví ya gí bà konì yo ta bà sè ta nèté gítí bà tee njembí yo mítí Mbìrì mí tà to tí kpòò. ³ Ze bàkà ènò tacó wàa, njembí yo 'dáá gí 'ví me ta duù gbí ña vò o tí nó náa yo kpónó gbí nô. Yo delè ta kpéétí yo ñò ni gí, máa, ñìnò a ña ñìndi ndoo gbí tú ndoo. ⁴ Tacó ze táánò kù ci yo ta o tí nó náa ze kuu tí mì yo kà nó éno máa, «O bà mèèkè'i tí yo mì ndâ 'duù ká kèjì! O bà mèèkè'i tí yo mì ndâ 'duù ká kèjì!» Káa à kpónó nò a yí náa yo kù ñò mítí yo nò. ⁵ Ye táánò tuu Tìmatéyò nò éno máa, yí ya gí bà ñò máa, yo ká kpòò kù tee njembí yo mítí Mbìrì wè? Tacó ré ze kaṛa ta gúku gí, máa ndâ-'bî-lá, wotí mì Vò-'duù-tí-nò mbe kù eendi ndâ 'duù gítí vò i nó bà ndii muu wotí mì yo, tí ña ñìnó náa ndâ nèté tí nó náa ze táánò bàkà gbí òkò tí yo kà nó bà ya sínò.

⁶ Káa Tìmàtéyò giì dele ndi wó 'do mì yo kà jì ze ta ngú có mbe peteke tàkòcò ze éno máa, yo kú tee njembí yo mítí Mbírì, yo kú 'vala ta ndâ 'duù ta tó njembí yo, tàkòcò yo ta o 'dáá gî ká pétékè'i gítí ze, yí delè giì 'dè có jì ze máa, kô'o tí ze bà ziki yo kà gî, go ñinó náa kô'o tí yo kú kařaka ta ré ze kàá gî nô. ⁷ A có bà tee njembí yo mítí Mbírì nò ká kú 'dèè njembí ze gbí ndâ ña bà mèèkè'i tí nó náa à kú mèèkè mítí ze kàá nô, ndâ ná'vindí ze. ⁸ Njembí ze kpónó ki tí to gî, tacó ze 'di gî máa, 'bì yo ká kácáá kuu tí Mbe tí ndoo. ⁹ Ze kpónó 'ví 'dè ñikì maa jì Mbírì gbí ña nje có yè gítí ña bà peteke tàkòcò ze tí nó náa ze kpónó tí kuu kùro wó tí Mbírì tacó tí yo nó! ¹⁰ Ze kú 'deke tí ze jì Mbírì ta síí gbí wálá, tacó wàa, yí 'ví si ndoo 'ví 'de tí ndoo káká'i. Tacó wàa, ze 'ví je ndâ 'bí i ñinó mbe gboo 'do tí bà tee njembí yo mítí wó tí Mbírì gî nó jì yo.

¹¹ Ze kú 'deke tí ze jì yí tí Mbírì tí Bu ndoo, ze delè kú 'deke tí ze jì Mbe tí ndoo Jézù tí Bìndi-Mbírì, máa, ndú 'ví 'viindi kpokèjì bà ya gí mì yo kà jì ze. ¹² Ze kú 'deke tí ze éno máa, Mbe tí ndoo 'ví je bà 'vala ta tó njembí mí gbí òkò tí yo jì yo, yí delè 'ví si yo 'ví 'vala ta ndâ 'bí tende 'duù ta tó njembí yo á go cè bà 'vala ndoo ta ndoo. ¹³ Tacó wàa yí 'ví bàkà yo tí ndâ 'duù ñinó ta bà lê tí yo wálá, náa yí tí Mbírì kaa yo mò gí mì wó gî á kùro wó tí Mbírì mì ndoo tí Bu ndoo, ta o bà gí ndâ Mbe tí ndoo Jézù ta ndâ tó 'duù mì wó wúnò.

Nà bà 'vala ndò ònó mbe kù peteke tàkòcò Mbírì nò

¹ À má éno, ze kpónó kù wa ji yo a gbí ta rẹ̀ mì Mbe tí ndoo Jézù éno máa, yo káká'ì 'ví ne 'do tí ònó kpokèjì 'valá ònó mbe kù peteke tàkòcò Mbírì, náa yo táánò ònó 'do mì ze nó lá, ndá ná'vindí ze. Yo co ká tí gbèe kpokèjì tí nò, á go ònó náa yo kpónó kuu nje nò dúú kù ya tí .
² Tacó yo ònó ndá i tí nó náa ze táánò nìbà ndú ji yo á 'do gbí wotí mì Mbe tí ndoo Jézù nó ni gí.

³ Có gbí njembí Mbírì gítí yo éno máa, yo 'ví dù tí ndá tó 'duù, wàa yo 'dáá gí 'ví dù janga-jàngá gí ndíi á 'do tí ndá vò i. Yo delè 'dáá gí 'ví dù tí ndá ngbáràngà 'duù mbe kù kù'ìbà 'do tí bà bàkà bangbaya. ⁴ Wàa yo 'dáá gí 'ví kò nìi gbí tó kpokèjì náa ndá 'duù kù te duù mítí , ⁵ yo dù ta go bà dù ta ndá nìi sàkàmàà go i mì ndá 'duù ònó mbe ònó dúú kpokèjì bà peteke tàkòcò Mbírì ni lá nó lá. ⁶ Có gbí njembí Mbírì gítí yo delè éno máa, 'bí 'duù 'ví gírì'o ta 'viya gítí ná'vindí wó ta bà tẹ̀rì cìkii nawù wó nó lá. Ze táánò 'dè có tí nò ji yo sàà kùro gí. Ze delè gíi ci yo éno máa, Mbírì bà waa có mítí ndá mbe bàkà ònó i-'viya tí nò ta wotí ká tí nò gí. ⁷ Mbírì táánò tẹ̀'é tí ndoo me gítí gílìni lá; yí tẹ̀'é tí ndoo tacó wàa ndoo 'ví dù tí ndá 'dóo ònó mì wó tí Mbírì. Yí tẹ̀'é tí ndoo tacó wàa ndoo 'ví dù janga-jàngá gí ndíi 'do tí ndá vò i. ⁸ À má éno, 'duù má nẹ̀ tù wó 'do tí bà 'di có tí nó náa ze kù 'dè nó gí, yí kù nẹ̀ tù wó nó me 'do tí bà 'di có mì ze tí ndá 'duù go yí lá, yí kù nẹ̀ a i 'do tí bà 'di có mì Mbírì tí mbe je Bẹ̀rì mì wó tí Mbírì ji yí tí 'duù tí nò.

⁹ À má gítí có bà zè ndâ ná'vindí yo ñìkì maa, nderè bà cu wáràgà mì 'bí 'duù 'do gbí òkò tí ze á jì yo gítí ñìnò wálá, tacó Mbírì táánò ñìbà ñìnò jì yo gí. ¹⁰ À delè dú káa yúcó máa, yo kpónó kù zè ndâ ná'vindí yo gbí ndâ to Mèsidóniyà 'dáá gí ñìkì maa. Káa ze kpónó kù 'deke a tí ze jì yo tí ndâ ná'vindí ze éno máa, yo 'ví zè tí yo gbí òkò tí yo dúú kù ya tí gí kùro ñìkì ndii ñìnó náa yo kù bàkà kpónó nó gí. ¹¹ Yo bàkà wotí gítí éno máa, gbínje 'ví dù gbí òkò tí yo lá. Bìndi , yo 'ví koṛo có me gbolò a i gítí bà bàkà nèté tacó bà 'de i-zó-zò mì yo, á go có tí nó náa ze táánò 'dè jì yo nò. ¹² Yo ko tí yo ta 'bì yo, tacó wàa, ndâ 'bí tende 'duù 'ví ùlù ta rẹ yo éno máa, yo me ndâ mbe kù zò i gbí wu'o mì ndâ 'bí 'duù nò lá.

O bà gí Mbe tí ndoo wúnò

¹³ Go bà 'dè có jì yo gítí ndâ ku kuu tí ze, ndâ ná'vindí ze. Yo si bà dù ta sé có gbí njembí yo ngé ndii gí tacó tí ndâ 'bí ka yo ñìnó mbe cì gí nó mí to. Tacó ñìnò a ṛa i mì ndâ 'duù ñìnó mbe koṛo có gítí bà 'vala ndi ndâ ku 'do gbí muu'dú ndú lá nó ká nò. ¹⁴ Ndoò lê má ùnje gí, máa, Jézù táánò cì gí, bìndi yí gí 'vala ndi wó 'do gbí muu'dú wó gí, gbí éno máa, Mbírì bà 'vala ndi ndâ 'bí ka ndoo ñìnó mbe cì gí nó 'do gbí muu'dú ndú ta rẹ mì Jézù, ká go bà 'vala ndi wó tí Jézù nò, bìndi a yí tí Jézù ká bà gí gí bà tè kùro ndú ya tí gí gbírì. ¹⁵ Có tí nó náa ze kpónó kẹ̀jì gí bà 'dè jì yo nó a có mbe co 'do gbí nje Mbírì. Kòcò Mbírì éno máa, ta o bà gí Mbe tí ndoo káká'i wúnò, ndoo tí ndâ 'duù ñìnó tí ndâ wu 'duù ta rì tí nó nó bà yee mì wó kùro si ndâ 'duù ñìnó mbe cì sàà gí

nó mí ndii wálá. ¹⁶ Tacó ta o tí nò, à káa 'dóó Mbe tí ndoo ká bà gí 'do gbìrì gí muu to tí nò. Yí bà gí gí bà 'dè có ta kòcò wó ngéé gí yaà. Bìndi , kùro ndâ basìlì mì Mbìrì bà gii tè'é tí ndâ 'duù. Gbì mòngò mì Mbìrì bà gii me tí, bìndi ndâ 'duù ñinó tí ndâ 'duù mì Bìndi-Mbìrì mbe cì sàà gí nó ká bà 'vala ndi ndú 'do gbì muu'dú ndú á kùro má kózò gí nó, ¹⁷ àà bà gii tè'é tí ndoo tí ndâ 'duù ñinó mbe cì lá nó á gí mì ndú gbì kùlù mù tàrì, tacó wàa, ndoo 'ví kaa toko gbaanjé ta ndú ya gí kùro Mbe tí ndoo gbì pìpìrì, gí bà dù ngbé kà á mì ndoo ta ndú kà. ¹⁸ À má éno, yo yì tí yo gbí òkò tí yo ta o ku ta ndâ có tí nò.

5

Yo 'viindi tí yo á gítí o bà gí Mbe tí ndoo

¹ Káa à má gítí sè ndâ sili, ta ndâ pì, ta ndâ o bà bàkà tí mì ndâ i tí nò, ze bà cu mbè có gítí ndú ji yo wálá, ndâ ná'vindí ze, ² tacó yo ta kpéetí yo ñò ni gí, máa, o bà gí Mbe tí ndoo káká'i wúnò bà dù go bà gí mbe ngbà ta bèbìlì. ³ Ndâ 'duù ta o tí nò bà dù kù koṛo có máa, «Vò i wálá.» Káa ndú gii gu maa káa ndii ta bà gbo ndú mì vò i, go bà gbaaka niì mì gó-káyì, bìndi 'bí i náa ndú bà bàkà nó wálá.

⁴ Káa yo kpónó kù 'vala me gbí 'dí'di'o tacó wàa o tí nò 'ví gbaaka tí ta yo á go bà gbaaka yo mì mbe ngbà nò lá, ndâ ná'vindí ze. ⁵ Tacó yo 'dáá gí a ndâ 'viì gbì ngba'o, tí ndâ 'viì gbì ngbàà rì. Ndoos ta ndoo 'dáá gí me ndâ 'duù gbí 'dí'di'o lá. ⁶ À má éno, ndoo tèrì á go i mì ndâ 'bí 'duù lá. Ndoos dù tí zò'o ta ṛo ndoo ngbárángà'i. ⁷ Tacó

ndâ mbe tètì kù tètì a i ta bèbìlì. Ndâ mbe kù sa ta pe delè kù sa a i ta bèbìlì. ⁸ Káa ndoo a ndâ 'duù gbí ngba ɾi, à má éno, ndoo dù ta ɾo ndoo ngbárángà'i. Ndoosì bà tee njembí ndoo mítí Mbírì, giì je bà zè Mbírì nìkì maa, 'ví dù go kùngù tacó bà lì ta zì'i 'do tí ndoo gbí gó. Wàa, bà koɾo có lì mítí Mbírì 'ví dù tí i bà lì mû 'do tí muu ndoo gbí gó. ⁹ Mbírì táánò cu 'bì wó mítí ndoo me tacó bà mbu ndoo gí tàkò có mì kpo-tàkòcò mì wó lá. Yí bàkà a i tacó bà 'vala ndoo ta ɾè mì Mbe tí ndoo Jézù tí Bìndi-Mbírì, ¹⁰ tí mbe cì tacó tí ndoo. Tacó wàa, ndoo 'ví dù toko ta ndú sì ndoo kpónó kù 'vala muu to tí nó nò; delè tacó ndoo 'ví dù toko ta ndú bìndi bà cì ndoo. ¹¹ À má éno, yo je wotí ji ndâ 'bí ka yo. Yo konì tí yo gbí òkò tí yo á go ñinó náa yo kù bàkà kpónó nò.

Ndòngbú có

¹² Ze kù 'deke a tí ze ji yo éno máa, yo 'ví te duù mítí ndâ 'duù ñinó tí ndâ kpo 'duù kùro yo, mbe kù bàkà nèté bà nìbà tó kpokèjì ji yo ta ɾè mì Mbe tí ndoo nò, ndâ ná'vindí ze. ¹³ Yo te duù mítí ndú ndii bà te duù mì yo mítí sè ndâ 'duù 'dáá gí. Yo 'dè nìkì maa ji ndú tacó nèté tí nó náa ndú kù bàkà nò. Yo delè 'ví 'vala gbí òkò tí yo nìkì maa.

¹⁴ Ze kù yù 'do mì yo a nambeè éno máa, yo 'ví 'dè có gítí bà bàkà nèté ji ndâ mbe kpó tí kpoò, ndâ ná'vindí ze. Yo je wotí ji ndâ 'duù ñinó á gbí òkò tí yo ta wotí bà te ɾo ndú gí yaà kùro ndâ 'duù á tí ndú wálá nò. Yo konì ndâ 'duù ñinó ta wotí tí ndú wálá nò. Yo delè 'ví kònò ndâ 'duù 'dáá gí. ¹⁵ Yo kèèndè vò i gbí òkò tí yo lá. À 'ví dù gbí njembí yo ta o 'dáá gí káa có gítí bà bàkà

tó i gbí òkò tí yo, ta có gítí bà bàkà tó i ji ndâ 'bí tende 'duù. ¹⁶ Yo 'ví dù ta pétékè tàkòcò yo ta o 'dáá gî. ¹⁷ Yo 'ví kaṛa tà bà 'deke tí yo ji Mbírì lá. ¹⁸ Yo má gbí dà, yo 'ví 'dè nìkì maa ji Mbírì, à delè má volo mítí yo gî, yo má gbí mbúlùwu, yo 'ví 'dè nìkì maa ji yí, tacó ñìnò a ṛa có ñìnó náa à gbí njembí wó gítí yo tí ndâ mbe kù 'vala ta ṛè mì Bìndi-Mbírì tí Jézù nó ká nò.

¹⁹ Yo 'ví 'buuku muu wotí mì Bèṛi-mì-Mbírì lá. ²⁰ Yo delè 'ví go 'véṛè mítí có ñìnó náa a Mbírì ká wu mí gbí nje 'duù nó lá. ²¹ Yo 'viiki gbí có kùṛo má kòzò gi. Yo má 'de có tí nò tí yúcó, yo 'ví nanaka muu yo mítí, ²² káa yo má 'de tí 've có, yo 'ví mò tí yo 'do tí ndâ 've i 'dáá gî gî. ²³ Ze kù 'deke tí ze ji Mbírì tí mbe kù je tó bà dù ndò ji ndâ 'duù, máa, yí 'ví kaa yo mò gí mì wó. Yí 'ví si yo 'ví dù ta gbí òkò yo nìkì maa, ta bà lé tí yo wálá, ta vò i tí lilí yo wálá, ta njembí yo ngbàrángà'i kù ù ta ndi bà gí Mbe tí ndoo Jézù tí Bìndi-Mbírì. ²⁴ Mbírì tí mbe tè'é tí yo bà si yo 'ví dù tí ndâ mbe bàkà sóló i wálá, tacó yí me mbe ne 'do tí po ngo nje wó lá.

²⁵ Yo 'deke tí yo ji Mbírì tacó tí ze, ndâ ná'vindí ze.

²⁶ Yo 'vee ndâ ná'vindí ze kà ta njembí bà zè Mbírì tacó tí ze.

²⁷ Ye kù be ji yo a tí Mbe tí ndoo éno máa, yo 'ví 'deke wáràgà tí nó ji ndâ ná'vindí ndoo á mì yo kà 'dáá gî.

²⁸ Nambeè mì Mbe tí ndoo Jézù tí Bìndi-Mbírì 'ví dù ta yo.

**Ngú bà toko nambeè mì Mbírì ta ndâ 'duù
Ndogo: Ngú bà toko nambeè mì Mbírì ta ndâ 'duù
New Testament**

copyright © 2001 Wycliffe Bible Translators, Inc.

Language: (Ndogo)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

14424ae9-b5af-591e-814e-49316d8d74aa